



滇臺行藁序

滇臺行藁二卷今撫治江右中丞鳳竹
徐公前為滇藩臬大夫時或奏記兩藁
或出教飭下大要具是總之公治迹也
藩臬兩司領部內郡縣簿書填委即使
主者甲乙之具曉所以則號為精敏踔
絕矣顧未必能持續含毫采儒法切事
情一一錯綜以文雅也縱令有之第取



鹽米靡密及細故整齊而已一當大計
鮮不首鼠夫人才性不相能每如此何
我公之行能該備一切粲然著尤異也
余尚識其大者一二事如鎮將以家事
撓

國法衆口沸騰危疑叵測公徐為計關白
兩臺卒賴其策上不損

朝廷之威下不絕功臣之統功施至今上

首弱者白首不得官強者自具冠帶以
臨其人視令甲笈如也公具得要領於
是請捕治吏人乘土酋襲替索金貨者
論以罪一時遵襲無敢後期諸夷欣戴
中朝清明之治以故大小守職不少嗟
跌督理銀場檢約周至諸場歲課辦集
如法比居總憲務先教化條正婚喪等
類矯其陋俗間舉大學衍義補纂要一

書請得刻視諸生如督楚學時其意深
遠矣蓋閔近世學者性命深言之顧于
治平獨濶略也諸事具橐中此類非一
皆公憑几草授書吏義正文雅可視後
世偉哉公所為治迹乎豈比夫日取不
急紛更文飾以沽譽者哉無何治聲流
聞溢于京師

上心嘉焉擢典內藩隨拜臺端大江以西
舉屬撫治至則庶知被水所在及

上供磁器工費踰昔特為民患公首具疏
請減其年租并改諸器樣

制皆可之江右之民懽若更生矣大氏公
忠誠體國不為私圖才本恢竒加以歷
覽閔博故能斷大事著名絕域早尚風
節不事權貴人雖以治邑異等選授侍
御不得留京處之南臺必下遷乃已公

不為少屈臨事持正衆莫可奪事竟夷
然不以自異古所謂大臣者非公其人
與往余同官于滇識國器所在公亦不
以余為不肖日切劘余因是幸得無罪
叅迹登臺有由哉其曷敢忘是中所載
余盖目覩之徃徃覆視按迹以從語云
不習為吏視已成事誠然哉竊不自揣
論序以傳視後之治滇者

今上熟知公名旦夕召入備六卿之選規
畫

朝政翊贊

鴻謨臺省之間又當相傳書疏以為故事
豈直斯卷為滇計乎豈直斯卷為滇計
乎

賜進士出身通議大夫奉

勅提督軍務巡撫浙江都察院右副都御

史前應天府府尹筠郡治生鄔璉拜撰

滇臺行稿序

此稿為大中丞鳳竹徐公往歲蒞滇時所
條興舉檄文也公才望素著海內治滇三
年屬其時紀綱廢弛民夷困敝公指揮擘
畫動中機宜蟠錯紛拏迎刃節解坐令跋
扈屏息滇土奠安其勲猷通濟豈獨利一
時寧一方哉予不肖向恨識公之晚歲已
已待罪滇南右轄適今大中丞東泉鄔公

海臺行稿 卷一
為左使公總憲臬凡事關因革建置繫於
國體民瘼者必予三人會議事允衆論然後
舉行彼此相參各無係吝不啻埴篔之和
也夫天下事非一家私計當以天下之心
行之乃予所見公平正大之士則公與東
泉其人也公幹局精練智識有餘其所條
經濟方略業已見諸施行有成績矣乃復
不以自私哀其大要釐為二帙命曰滇臺

行稿每質於同志東泉公謂予曰凡此種
種皆公又安西南大計覃精日夜積思熟
議而後得之宜刻之公於四方庶后之治
滇者可致鏡也予曰然即公欲自秘其如
國家大計何哉夫愛一己而墮國計非忠也
重自表之嫌不以公於有位其視已與天
下猶有二也公處天下之事猶已之事豈
不能以已之善公諸天下哉會有軍旅之

後不果刻定宇柴公廉訪江右雅有徐公
風度遂請錄校刻之君子之心皆以天下
為度而已予故樂為之書

萬曆元年五月吉日

賜進士第通奉大夫雲南等處承宣布政使
司左布政使前奉

勅提督廣西雲南學政錢塘陳善撰

滇臺行稿目錄

卷之一

臨元道

- 一 置辦公用什物以革科擾地方事
- 一 申明起送任滿官員以杜營差以肅政體事
- 一 除奸增課事
- 一 嚴禁稅課司私票常例以革科擾宿弊事
- 一 地方事
- 一 禁革收放屯糧奸弊以便軍人關支實惠事
- 一 查議公平分給軍糧銀兩以除剋減弊端事
- 一 立法應付公共差委以革冒濫以蘇驛堡疲

困事

一嚴禁土官襲替常例積弊以恤夷方以肅公門政體事

一嚴禁約以肅清衙門事

一照值給價以蘇舖行以革弊端事

一禁革營求民糧差委以清吏弊事

銀場道

一嚴禁委官營差弊源以肅官箴以完國課事

一欽奉 聖諭事

一酌議銀場事規以杜弊端以濟國課事

一報開銀場事

卷之二

臬司

一建立義塚收埋枯骨以順天和事

一呈兩院處總鎮事宜揭帖

一遵奉 明旨懇乞 天恩赦宥事

一路當衝要五路通衢夫少差繁困窮極苦懇

遵勘合革減以甦民生事

一欽奉 聖諭事

一武定勘功罪事

一查處遠屯糧米以便收放事

一禁革屬衛科派饋送以恤貧軍以肅戎政事

一 群奸撥置功臣上違天命下害良民積怨漸
 深叛亂屢作懇乞 聖裁以預圖久安事
 一 申明例正職掌以一政體以安地方事
 一 群奸撥置功臣上違 勅諭下害良民積怨
 漸深叛亂屢作懇乞 聖裁以預圖久安事
 一 再論鎮臣違命不悛懇乞 宸斷以正國法
 事

卷之三

一 添設獄官以制囹圄事
 一 陳末議以正士風事
 一 仰仗天威命兵勦滅久叛夷酋地方寧謐查

錄功罪人員懇乞 聖明俯賜勸懲以勵人心事

一 巡撫地方事

一 酌議查革冗費民壯以甦民困事

一 儲養將材以壯戎政事

一 查理庫貯駐衣以濟給獄囚孤老寒苦事

一 陳三事以塞瘵曠事

一 陳愚悃以裨盛治事

一 嚴緝捕以安地方事

一 摘陳弭盜之畧以急救地方事

一 估修衙宅以正法體事

一 議處改設叅將兵備官員以肅戎務以安地

方事

- 一 勢惡管莊串同未獲強賊挾辭抄搶家財事
- 一 嚴禁非法刑具以恤徒囚以重民命事

卷之四

- 一 議節里甲支銷舊規以一政體以恤民瘼事
- 一 慎轉詳以申法紀以重民命事
- 一 地方警急事
- 一 酌議米價以免虧累事
- 一 急救三村人畜倒懸生命事
- 一 重刻大學衍義補纂要以嘉惠多士以重崇文教事

一 申嚴明禁以裨鄉約以敦風教事

一 矜恤獄囚以慎重民命事

一 議革松南二壩委官抽稅以肅政體以蘇小

民積困事

一 掩骼埋胔以恤孤魂以召和氣事

一 伐弊除患以靖地方以甦民害事

一 極苦民情事

各省行稿節要 附後

一 議定實徵歲額成規以一政體以便民情以杜紛更弊源事

一 審編均徭事

已上山東右布政使時有行

一官兵奮勇殺賊致獲全捷事

已上浙江僉事監軍江右平賊時有行



滇臺行稿卷之

雲南布政使司右叅政徐 掌理堂事稿

計開

一為置辦公用什物以革科擾地方事照得三司各道到任墜遷及歲時往來等項舊有公宴乃禮之不可已者則公用什物亦日用之不可缺查得先年公用磁器等項俱係本司自買應用該吏掌管一物不取於舖戶里甲此不惟本省司中為然而於政體亦宜爾也後因年久遺失損壞不堪於三十八年分偶遇公宴席多缺少磁器暫行票稅課司借辦於昆明縣借辦盒担初次起於暫借後遂

習以爲常相沿日久欲革未遑今查稅課司每磁
器一桌出貨銀五分其損失賠償之費又在外極
爲科擾店戶及昆明縣盒担藉此騷擾里甲雇倩
費多亦難免指一科十之弊夫此似一事也而有
關日用則在官之取數恒多在下之受累獨切未
免有向隅之感矣且因此擾民殊非政體相應酌
議復舊合候呈詳允日備行濟用庫於課程銀內
動支二十九兩八錢五分六釐給各舖戶置辦磁
器二十桌盒担十二副檯盒四副照依後開數目
辦完於本司後堂空櫃內收貯責付工房該吏收
掌置立印信文簿一扇將所買前項什物備細登

記於簿內自今五月爲始每月再輪流二吏管領
遇有公宴照數支用用畢收貯月終工房該吏眼
同輪管二吏與下手吏交代明白接管若有遺失
損壞量行置補蓋必月終交替接管始便稽查不
致遺失廢弛本司仍出給禁約告示曉諭地方知
悉仍通行稅課司昆明縣各遵照禁革以後再不
許指稱公取磁器盒担等項科擾店戶里甲人等
以祛弊端如此庶公用既便下無科擾矣

一爲申明起送任滿官員以杜營差以肅政體事照
得滇南所屬衙門倉官週歲任滿將經手錢糧放
支盡絕巡檢三年已滿查無違礙各申請覈實明

白例該赴部給由此定法也今各官任滿之後不行起文朦朧告差希圖覓利以致事露犯贓革職又有雖經起文潛住省城不行赴部者又有等年老官員不能銓束隨任子弟縱令嗜酒賭博淫蕩坑陷流落不得還鄉者是各官始欲規利卒受實害非惟法紀不容亦非各官得計如雲南後衛倉副使張銀廣南倉副使吳富臨安衛倉大使茹焯等俱已任滿反朦朧捏呈討差繁擾查無空閑衙門可委竟不依例給由殊非政體相應立法禁革合候詳允通行各該府州縣轉行所屬衙門遵照今後倉官巡檢任滿給由各該府州縣掌印官查

勘任內事蹟等項果無違礙依期給文起送不許容留如已領文不卽赴部營差者追奪原領咨批不准給由但滇中去京萬里果有貧寒無力赴京者本司申請量給脚力資助窮途如各衙門掌印官不行嚴查起送容留營差有違明例自貽後患者查訪得出掌印官別議先將首領官該吏提問以杜告擾之端其倉副使張銀等照例起送如再延住營差定行提究叅提罷職不叙庶杜營差弊端而亦以申明法紀之公體恤各官之情也仍將任滿官員姓名逐一查明預先申報查考惟復別有定奪未敢擅專合就通呈爲此今將前項緣由

理合具呈伏乞

照詳施行 一呈

巡撫陳 批各官任滿不行給由恣意營差放利鄙猥無耻殊可賤惡該司此議良得祛弊戒貪之法准行各衙門嚴查起送一有貧難量給腳力敢久容留在任及營求差委者一體叅提重究張銀等仍敢潛住省城卽拏究革此繳

巡按劉 批此弊徃徃有之殊非法體依擬嚴行遵守如已查覈無礙故意延捱不赴部者卽行究革掌印官別議此繳

爲除奸增課事行據雲南府申准本府署印通判

白采牒問完犯人楊策等招由并銅場興革事宜呈詳到司據此案照隆慶元年四月十八日申時

奉巡撫陳 批據本司呈詳問過犯人聶傑等招

由前事奉批各積年店戶隱漏官稅每貨百斤除私費銀四錢可省官稅銀四錢尤多將私給稅票徃復重照連私費四錢亦不用者各委管隘等官每貨百斤有票則科銀一分無票則科銀一錢是衙門積習之弊亦當痛革况各店戶宿弊詎可輕縱而聶傑所告雖爭店而其匿稅之情豈皆厚誣乎仰布政司另行盡法嚴究務剔絕奸欺以增

國課以清治理招解繳奉此遵奉已經牌仰雲南府

嚴查追究酌議去後今據前因除將犯人楊策等
另詳解審外本司今將有關銅課應興應革事宜
逐一開款呈請

鈞裁伏乞照詳施行奉批據議嚴煎煉以革私販稽
輸納以防隱匿互查禁以杜夾帶加餘耗以供會
省深得清源剔蠹之法有裨銅政准行各衙門官
吏查照遵行務要守法奉公嚴加督察着實盤驗
敢有仍蹈徃轍受財賣放私銅展轉不銷號票者
該司卽行拏問坐贓治罪該州掌印官果能祛奸
增課呈來獎勵妨政滋弊從重參究此繳奉此又
蒙

巡按劉 批依擬備行禁革遵守加耗一節均如
擬此繳

計開

一議查革煎煉獎源

前件查得夾帶私銅其弊專在於路南煎煉處
所若本處委官得人督令秤役畏法每銅一
馱如數止秤一百六十斤照數發行則本源
清楚奸弊何由而生私銅何由而發蓋銅課
譬則水也其始煎煉發銅處所猶水之源也
其所至下山水通行等處猶水之流也若
發銅處所委官不為清查斤馱數目明白使

無夾帶而欲其下山水等處無私銅混冒之弊是猶水源不清而欲其末流之潔必不可得已故委官煎煉之任最爲切要不可不慎及查先年該州地名板橋相離產所八十里其間多被奸商竊行小路曾將荒銅移出板橋另設一官專管分理煎煉州官總理專爲竊行小路而設但今商人在場買銅十馱又稅銀三兩至省城又報納下水課銀八兩至交水稅課局又納出境稅銀四錢方得發賣以拾馱言之在官已輸稅銀一十一兩錢其諸腳價盤纏并各關隘無名之求又

可言所得有幾茲若板橋再設一官未免與路南委官互相推調且增騷擾似不必更置合無行該州正官照舊管理煎煉嚴禁扶秤巡攔人等不許需索分例多秤餘銅務須潔已奉公除奸剔蠹以副委用其板橋一帶小路必設法嚴禁毋得縱容竊行斯本源既清未流自潔雖欲夾帶私銅無由而起每年終如該州委官廉能著稱致使銅販疏通國課增益本司申呈獎勵若有妨政滋弊定行參究此銅課正本第一義也伏乞

鈞裁

一議嚴立納課票限

前件查得委官發下山銅票本司有鈐印底簿
湯池巡檢司有半印循環簿商人將銅鈔載
嚴限日期由湯池巡檢司比號到省隨將大
票一張赴司比截發賣聽其召商原無定限
以致任意遷延歲月隱匿莫稽今限以半月
似爲期逼合限以一月如無買主再限發賣
似亦限寬復滋弊端相應酌處合無定限二
十日召商承買齊票赴司報稅本司查照舊
規不拘多寡每大票一張編印下水小票十
張發昆明縣每張收課八錢共銀八兩如票

限過期無人承買本商店仍執原票赴司告
明換給再限該縣照數收完課銀填給各商
小票發銅仍行各巡檢司小票刊有四角照
前定立限期自牌單發縣爲始十五日自省
城由白塔關過赤水鵬五日過魯婆伽三日
過阿幢橋二日到交水局每張本局收稅銀
四分共銀四錢類報本司查考行之畫一彼
此稽查立法自嚴但商店執票在外名雖發
賣召商意多遷延展轉本司固常以時查究
而奸頑者終屬過期相應再行立法稽查合
無本司將投到大票比截明白一面發商領出

召商一面印刷小票一張將前領票發賣商店姓名定以限期先行昆明縣登記號簿查照至期如遇商店不行召商赴司告報該縣將違限緣由申呈本司拏問如匿票一張者倍追銀十六兩如此度上下稽查重照而奸弊可革矣伏乞

鈞裁

一議分任查禁私銅

前件查得商販發銅不遵禁例始則買囑扶秤人役多秤餘銅夾帶既而通同買囑巡司不行盤詰其間又有與巡司官吏射利放行雖

有犯者多係常人拏首未見巡司官吏奉公盤解及查白塔關係稅課司差人在彼攔查商貨與銅稅無干蓋由委官縱容不禁關隘玩法需求銅政以此漸弛遇有私銅經過却聽奸商買囑不舉相應禁革合無本司通行管場委官并各稅課巡司遵照以後商販銅票每馱止秤一百六十斤每十馱外加無稅耗銅二百斤此外再無餘銅務照官較公平大秤相同無弊卽與截角放行如有多餘夾帶私銅在湯池巡檢司盤獲者罪坐該場委官該吏及巡攔秤役在省城轉賣下水至赤

水鵬巡檢司盤獲者罪坐湯池巡檢司官吏
并省城店戶在魯婆伽巡檢司盤獲者罪坐
赤水鵬在阿幢橋巡檢司盤獲者罪坐魯婆
伽在交水稅課局盤獲者罪坐阿幢橋各巡
檢司官吏俱從重問擬如律各巡司遇有銅
到卽於十馱內掣秤一馱如有多餘夾帶一
馱者其十馱盡數入官具由申解隣近有司
問招申詳一體獎賞若弓兵商脚諸人有能
舉首得實者應賞之外仍於商犯名下追罰
貨價一半充賞其稅課司官吏家屬攔關并
各巡檢司官吏俱不許強索過關銀稅賣法

求索違者許商人具告拿問仍每月終管場
委官并各巡司照舊填報循環結狀一體申
報稽考庶分任責成奸弊戢革而課額自克
矣伏乞

鈞裁

一議加添打造耗銅

前件查得下山銅馱先該本司定議每馱一百
四十斤後因礦脉興旺銅價輕賤商販稀少
議行路南州每馱加增二十斤共一百六十
斤再不許分外夾帶但課稅有定額之規銅
馱無加耗之義茲不加議耗銅未免扶同夾

帶及查鄒知州覆議每十馱容加貳馬該二百六十斤殊不知馬之脚力強弱不同大較一馬強健者止駝得一百六十斤其弱者則又減矣故名雖容加貳馬而實未嘗加也然省城合用銅器自不可缺凡打造人戶每向各商店將到省銅馱鑿碎買用以致商店將本司比過號票隱匿不行報課遂有銅去票存混夾私銅莫可稽考之弊今雲南府議每銅十馱加耗二百斤票內明開無稅耗銅以爲在省打造答應官銅并軍民買用則此外一票十馱之銅可徑發行下水而店商無藉

口打造之賣合嚴行管場委官親秤填票截角納課毋容秤役巡攔老人等項通同作弊多秤少報每馱照舊一百六十斤爲准十馱外加無稅耗銅二百斤以克前項省城打造答應官銅并軍民置買等用其下水銅馱照數上納課銀違者聽所在有司申解本司究問各商店侵欺重罪斯夾帶無所容而商旅亦願出於塗矣伏乞

鈞裁

一爲嚴禁稅課司私票常例以革科擾宿弊事隆慶二年六月二十三日奉

巡撫陳 批據近該本司掌印右叅政徐 會同
按察司掌印副使陳 呈查得雲南府稅課司委
官及該司官吏每季饋送二司吏書各寫本吏并
守巡安普督糧道及雲南府吏書上至祿膝下至
清水江赤水鵬關索嶺鐵爐關湯池等處各巡檢
司官吏每季送家私私票各一張每張開瓷器家
私一副票內明開仰店戶某送某衙門吏書等字
樣不用瓷器折銀五錢五分派及鋪行人等出辦
是何法紀其該司官吏指稱科擾商旅小民以圖
入己者又不止此數也揆其所由蓋因舊時各道
公宴票發稅課司取瓷器借用以致該司官吏藉

此名色多出私票行求各司府屬吏書互相容隱
以便匿稅侵尅誠吏弊民病一蠹也今二司公用
瓷器等項已經議呈詳允自行置買應用免其借
辦則此項不惟費出無名甚非衙門政體本當從
重究治但相沿日久官吏更遷不常似應嚴行禁
革合候呈詳允日本司備書大字告示曉諭該司
官吏并各衙門吏書人等遵照將前每季送家私
常例私票盡行嚴革不許仍蹈前弊假此科害舖
行店戶商旅等項如有故違或查訪得出或被入
告許定將該司官吏坐擬贓罪如各該吏書故稱
常例仍前索取者該司官吏指名申報本司以憑

拏問度冗費頓革吏弊亦清而舖行無科擾之累矣仍通行各衙門一體禁革呈乞照詳施行奉批稅課司餽送各衙門吏書家私公行賣緣爲奸法紀安在卽當拏究姑如擬曉示嚴加禁革此後敢有踵襲宿弊挾勢需索而官吏指此科害店戶者該司嚴行拏問坐贓治罪此繳又蒙

巡按劉 批依擬備行禁革以釐宿弊繳

一爲地方事隆慶二年五月二十日申時奉

巡撫陳 憲牌仰司着落當該官吏照牌事理卽查所屬雲南臨安曲靖尋甸澂江武定姚安楚雄大理景東蒙化永昌鶴慶等府見今庫貯官銀若干

堪以動支若干應否糴米收候如無堪動官銀應否將本院贓罰銀兩解發各衙門收糴務要酌量繁簡分別等則議處停當具由通詳施行等因奉此行據雲南府申稱查得本府廣盈庫堪動止有

撫院贓罰銀三百三十八兩三分六厘五毫并分巡安普等道贓罰銀六百六十兩九錢二分六厘五毫本府徑理銀七十四兩六錢三分七厘三項共銀一千七十三兩六錢在庫又據曲靖府申稱查得本府豐實庫止有支剩徑理紙贖銀七十一兩三錢四分二厘八毫及

撫院分半贓罰銀一十二兩四錢徑理紙贖銀六十四兩六錢二分七厘五毫三項共銀一百四十八兩三錢七分三毫相應動支糴米備用又據澂江府申稱查得本府廣盈庫收貯備賑稻穀銀二百一十八兩四錢四分七厘九毫四絲三忽七微五纖又累年積下解軍盤纏銀二百四十兩內存留一百兩外餘一百四十兩亦堪動支共三百五十八兩在庫又據武定府申稱查得本府常用庫止存堪動

撫院贓罰銀五十三兩四錢五分本府徑理贓罰銀一十九兩四錢二項共銀七十二兩八錢五分

在庫又據臨安府申稱本府庫貯

撫院贓罰銀三百二十兩四錢三分二厘五毫查發放實人戶糴貯備用又據楚雄府申稱查得本府常盈庫止有

撫院贓罰銀四十一兩七錢二厘五毫并分半紙贖銀三兩五錢五分及各道紙贖銀六十七兩四錢五分本府徑理紙贖銀一百七十七兩七錢二分三厘五毫四項共銀二百九十九兩四錢二分六厘在庫並無堪動糴米銀兩各緣由申報到司據此看得糴米備荒誠當今地方要務而滇中邊夷遐荒水旱不時尤當預處積貯以拯民患據各府

申稱在庫堪動糴穀銀兩雖多寡不一大率未爲有餘如欲多爲儲積則庫貯匱乏不能多支况今禾苗方成米價騰貴若欲刻期糴買未免反起抑勒之端貽戶民之累及照本省地濕不便積米恐年久腐蛀無益實用尤以積穀爲便俱應酌處合候詳允將各府申報庫貯前銀應堪動者照舊動支給糴其數有不足於本司課程銀內量行動給湊買發各府掌印官須先期給發買人戶待十月收成照依彼中時價兩平收買乾圓好穀隨赴該府舊貯預備倉交納如法收囤尤恐所積有限而後來支賑之數不足相繼仍自今以後年分候秋

成之際該府查貯無碍堪動官銀呈允動支給買稻穀以一千石爲率繼續貯倉以備將來賑濟如有年久積腐具由申請出陳易新每年遇米貴則減價官糴以平乎市價遭歲荒則出穀賑給以濟乎貧乏仍嚴禁收買委官不許濫收插和糠粃沙土着水稻穀以致沓爛不堪亦不許指此科擾致生事端抑措交收人戶查有此等弊端許被害之人指實呈告以憑拏究并行令各府將糴過穀數先行申報仍於原置積穀循環按季填報到司倒換查考如此庶事爲有備民不告災而地方未有攸賴矣爲此除行尋甸大理蒙化鶴慶永昌景東

姚安等府申詳至日另行別議今將雲南等府申報銀兩并本司量動課銀分別糴穀數目呈乞照詳施行奉

巡撫陳 批雲中隨處倉廩空虛殊失備邊之策該司發銀糴穀足濟緩急剴切時機如擬行令各府掌印官動給應買人戶候至秋成兩平收糴不許虧累小民及因而生事科擾以後年分照數糴備出舊易新仍嚴催大理諸府遵議通行此繳又蒙

巡按劉 批依擬動支積穀以備地方繳計開

一議穀價因所屬地方豐歉貴賤不等相應照依各府地方時估發買庶為民便今酌其中每石以四錢為率後開各府若穀賤而銀數多則量增糴如穀貴而銀數少則量減糴俱候糴完之日申報登簿查考

一為禁革收放屯糧奸弊以便軍人關支實惠事照得本司原議坐放軍糧事規單月於近城倉雙月於遠屯倉輪流呈乞關支但其間糧米腐蛀好歹不同地單遠近不一俱由堂上酌量親自裁派並不經由吏書干預分毫誠恐無知及積年棍徒假以使用營幹為由索騙軍人財物不無有虧苦軍

甚非衙門法體除出示曉諭在省在外軍人知悉
今後如有棍徒并在官吏書人等不遵禁約仍前
故違索騙者許卽指實赴司陳告以憑拏問告人
定行重賞若知而不舉及受財私和者事發一體
連坐其關領糧銀皆係定色官銀當堂眼同該衛
委官公平秤足並不輕少絲毫若有委官識字并
積年棍徒指稱使用打點尅減各軍糧銀者卽許
赴告重治決不輕貸

一爲查議公平分給軍糧銀兩以除尅減弊端事照
得本司凡遇坐放六衛旗軍折色月糧銀兩呈奉
詳允備行各衛開具印信領狀赴司於濟用庫收

貯屯糧銀內照數領回行委雲南府官一員督同
掌印官唱名給散已是舊規近該本司查得分給
前項糧銀每軍一名該銀四錢有減少至二三分
者或四五分者有之蓋因各衛發散各所各所發
散旗軍識字旗軍識字分散各軍原未經掌印委
官唱名分散又不覆查銀數是否甚至各旗識以
軍之強弱爲銀之輕重又有倒肥分散以便侵漁
任憑上下其手以致彼此剝削遞相扣減遂輕少
至此夫總數斲散未免分析或每軍止可折一分
以下若至三五分則貧軍不霑實惠相應立法公
平唱名分散以爲成規除將五月分實支旗軍名

數左衛一千四百五十五名該銀四百七十一兩
一錢七分紙帖一千四百五十五帖右衛一千一
十六名該銀三百三十八兩四錢七分紙帖一千
一十六帖中衛九百二十九名該銀二百九十九
兩二錢六分紙帖九百二十九帖前衛一千一百
五十名該銀三百七十七兩二錢一分紙帖一千
一百五十帖後衛六百六十一名該銀二百一十
九兩三錢七分紙帖六百六十一帖廣南衛七百
六十八名該銀二百四十五兩五錢紙帖七百六
十八帖恐有科派紙劄之費隨計美前數本司用
紙裁成每軍每銀用紙一帖照數給發各衛首領

官領回交付掌印官分發五所照依名數每軍一
名該銀四錢鑿分停當用前發紙帖包封完備仍
送各掌印官處會同委官通判白采於原封內各
抽數封秤驗足數當堂唱名給散不許減少若有
仍前減少至三五分者許該府委官指實呈報以
憑拏問俱經通行各官遵照并出示曉諭各軍知
悉去後續據通判白采稟稱親詣長春觀會同各
官將前領出軍糧銀兩對衆鑿分每軍四錢止少
一分各另包封逐名給散貧軍方需實惠等因到
司若不呈請立爲定規未免將來仍襲扣減之弊
合候詳允備行各衛并委官遵照今後如遇放給

軍人折色糧銀俱要查照近議事規責令首領官
赴司眼同濟用庫官攢當堂秤對官銀准足並無
輕少分毫照數領回交付各該掌印官分發五所
照依名數鑿鑿每軍四錢止許分折一分各用紙
包完聽該府委官并各衛掌印官抽驗無少唱名
給散務使各軍皆得親領原銀敢有仍前故違減
至三五分者就於各首領官名下追陪仍聽該府
委官指名呈報以憑拿問仍通行各外府衛所一
體遵照施行庶扣減弊革而均霑實惠矣為此呈
乞照詳施行奉

巡撫陳

批各衛所旗軍尅減軍糧弊深積習法

久廢弛據議足用一洗奸私而且使貧軍咸霑實
惠矣如擬通行遵照以爲永規敢有仍前侵尅者
卽拏叅究坐贓治罪此繳又蒙

巡按劉

批依擬均平分給以霑實惠繳

一爲立法應付公共差委以革冒濫以蘇驛堡疲困
事照得本省所屬設立驛堡本以應付公差人員
廩糧夫馬等項若非公差于法不得濫與雖有公
并亦不得多開冒支以滋浪費騷擾該本司掌印
右叅政徐 會同按察司掌印副使陳 議照合
屬員役告領夫馬牌票應付者其中守法自檢者
固有而假此於別衙門重複告討以圖虛冒者類

多如分巡金滄道揭開近有公差一名執票三張
廩給三分起馬六匹人夫十二名實止騎馬二匹
似屬冒濫向因事體未經申明各該員役每有隱
情越求希圖重冒支討廩糧夫馬者當此疲困驛
堡其何以堪相應立法議處合候詳允備行各司
道遵照如奉

按兩院牌票發司照依各自遵行其司道自有緊
急公務應徑自差遣者亦照舊外今後所屬差委
官員并各鄉宦士夫舉監貢生人等凡與三司各
道公共相關者每單月布政司雙月按察司輪流
應付此外不得又赴各司道重冒告領本司仍置

立總差文簿一扇用印鈐縫如遇差委前項員役
逐月輪流於簿登記明白應付以便稽查如有仍
前告給者不准應付其單月該布政司應付乃又
有按察司及各衙門牌票如雙月該按察司應付
乃又有布政司及各衙門應付者即係重領冒濫
悉聽兵巡外道所轄地方嚴查究革仍通行各府
衛州縣驛堡一體遵守施行如此庶事規畫一應
付簡便冒濫之弊自革而驛堡之困少蘇矣為此
具由呈奉

巡撫陳 批各差委員役一人而執三票甚為冒
濫夫馬該司釐革奸欺即懸驛堡困憊如擬置簿

稽查重領單票盜支廩糧濫起夫馬者卽拏坐贓
重治仍行各衙門一體遵照此繳又蒙

巡按劉 批依擬通行以革冒濫繳

一為嚴禁土官襲替常例積弊以恤夷方以肅衙門
政體事奉

巡撫陳 批據本司呈照得本省土官承襲冠帶
等項告奉

撫衙門批行本司備行守巡兵備該道及本衙門
重覆駁勘明白取具供圖族舍目把里隣結狀移
送到司凡宣慰宣撫長官司千百夫長隸兵房承
行府州縣巡檢驛遞隸吏一科承行移文按都二

司比冊相對具由通呈詳乞給文赴部承襲向為
成規但雲南地方僻處遐荒土官錫授官品鈐束
部夷傳襲子孫世相守土乃

國家安遠綏邊至意近查得本省土官襲替或父告
老子繼或因事故承襲柰緣省城積年光棍霸吏
一聞襲替緣由即揭債尋買品物前往投獻該襲
土官舍營謀幹辦稱云乾包局騙財物又潛入省
城交通各司道并該府州縣吏書百計科騙視襲
替為竒貨指日把若爪牙多方剝削百計搜求任
情刁蹬指勒遷延以致經年累月不得起送承襲
卽各土官舍承襲到任之後有管束夷民之責未

免襲後科索部落彼此剝削何所底止是雖屬夷人亦皆

朝廷赤子若此科虐騙害不惟無以清肅衙門且非所以體恤遠人昭示法紀也本司痛懲前弊已經通行所屬各該衙門禁約曉諭但恐夷人易惑積蠹易滋若不呈請嚴禁終難釐刷更新合候詳允備行守巡兵備等道通行所屬各府州縣大小土官土舍知悉以後遇有土官告保承襲冠帶者即先呈請守巡兵道查勘一經該道及本衙門駁查明白果係倫序的派相應族無爭襲等弊取具供圖并族舍目把里隣人等結狀移行到司即與

通詳不得過違二日若仍前指勒索取常例不與轉呈者許各土人赴告以憑拏問坐贓究革各土官舍亦不許仍蹈故轍聽憑積年主文吏書省城光棍誑騙需索或本司體訪得出或被人告發一併究治其打點包攬棍徒照例問遣各土官舍擬以財行求律坐罪不准承襲自襲替之後亦不許假稱承襲使用等項指一科十擾害部落自取罪戾庶宿弊漸除政體亦肅而遐荒夷服皆知

朝廷之法紀有在自畏威而懷德安分而守土矣為此呈乞照詳施行奉批土官承襲所司結勘自有森嚴明例何乃敢行賄賂囑托吏書聽信積棍惡

攬誑騙妄啗千金從而科害部夷殊爲乖戾法紀
本院先有條約禁諭矣該司此議尤見別蠹柔遠
之意准行各土官舍恪遵憲度敢有仍蹈故轍行
賄打點夤緣爲奸者各該司道嚴加體訪受財之
人照例問遣本舍依律重治不准襲替招解詳奪
施行此繳又奉
總兵沐 批懲剔蠹弊深切柔遠補拯之方仰依
擬通行嚴禁遵守敢有踵弊故違者照例問遣施
行此繳又蒙

巡按劉 批依擬嚴禁以恤夷方以肅政體此繳
一爲嚴禁約以清肅衙門事昭符本司首領庫獄案

牘等官能自檢束下人奉公勵節者固有但訪舊
時亦有縱容僮僕擅出司門在外遊蕩或遠行商
販詐判本司封條粘貼貨馱扛担冒渡關津不服
盤驗或假公委交通客商分獲課稅或指稱打點
需索人財每遇一應投文解納錢糧人役到省探
聽歇家先行賄囑方令投文雖隱瞞各官或有未
知然於居官法體似當連累法所當究但其弊積
習已久姑行禁諭爲此合行出給告示曉諭守門
吏承各役知悉凡各官務要謹身脩行恪守官常
不許仍前縱令家人出司遊蕩有所求爲需索人
財者或本司體訪得出或被入告發一體追究若

吏承知印家屬出入直門吏承皂隸驗實真偽方許放行如無懸帶小牌卽係打點誑騙捉鎖赴堂以憑重究若把門吏承人後遇有前項家人擅出狗情故縱不行稟查事發連坐決不輕恕

一爲照值給價以甦舖行以革弊端事照得本司并凡奉兩院取用包本什物紙劄并各項進

表等箱籠什物不得不行於舖戶取辦而舖戶辦送實出資本不可虧損若給價不以時復恐衙門人役指稱減少用滋弊端累及行戶甚非法也必須當堂交收查驗執票不拘多寡限同秤兌給價庶免尅減虛冒又恐承頭舖行領去官銀指不轉給

花戶又私下減少使小民不得霑惠合行示諭以杜欺瞞之弊爲此示仰各行舖戶人等知悉今後凡奉本司票帖取用應公用什物紙劄并各項進表等箱籠物件照數辦送各舖戶除當時給發領價外每月限二十九日各執票赴

公堂比對本司號簿明白照價秤足限同給領如價值未及一分者給與海肥至於一分以上者給與足色白銀中間若有減少許各當堂稟告卽與補給如有私下於知印并各該房科交通支領者所出過價銀不准該吏支銷舖行另究須至告示者

一爲禁革營求民糧差委以清吏弊事照得本司卽

目坐派夏稅緣本省夏稅錢糧不多各該掌印官
堪以幹理近訪得先年各衙門佐貳首領等別官
有為營求管糧預行多方托人在省寅緣該房吏
書管徵以致濫索分例糧里賠費歲額有虧甚滋
吏弊且為病民為此合行禁諭本年分夏稅俱委
各該府州縣掌印官不妨印務督行管徵不必另
委別官用啓科擾恐有不自愛別官踵習前弊通
賄吏書希圖妄委徵收者不惟徒費行求無益自
乖官常且非衙門政體如被人首告或查訪得出
本司徑自拏問併究決不輕恕
一為嚴禁委官營差弊源以肅官箴以完

國課事照得天下政體全在得人而銀場課務乃利
之所在庸流易溺弊窟易滋尤須得人庶有攸濟
今各場總理委官限以一年分理委官限以半年
各限滿日呈請更替此相沿舊規也使各該委官
胥得其人則場務克舉地方相宜卽寬之以歲月
固無不可者但訪得各官中間自愛奉公者固有
其不自檢者則以銀場為奇貨每遇呈委之期遂
圖告差一委到場恃倚更替年月常限尚寬罔思
國課為重惟以私殖是圖通同硃老行頭積戀棍徒
把持撥置和同作弊多抽少解嗜利滋奸或遇礦
盛旺不行報增任意隱匿侵分或遇衰微百計告

減虧損課額若以此輩充委在一日則一日之害
多一月則一月之害也使槩以常限更替是假以
歲月之久滿其溪壑之欲不惟課額日被侵匿無
所顧忌而於官常亦何所懲戒哉本道愚見擬須
立法稽查嚴示激勸伏候通呈詳允備行各產礦
地方該府州縣掌印正官及各總理官嚴督各分
理委官遵照今後各宜改圖自新守法完課無蹈
宿弊自犯官邪俱聽本道不時稽查分別勸懲除
總理官果能勤慎稱職照舊一年一換外其餘分
理官實有任事情勤幹濟有方增益
國課者照例甄錄呈請

兩院特加獎勵常限滿日仍行委用以示優異有
能修舉常職報完額課者亦如常限呈請交代若
玩法徇私貪墨不職虧損額課者不必拘前項常
限聽本道即時參呈追究更換如侵匿情重者仍
行拏問以警其尤每遇代期猶有踵習通同吏書
營求差委者卽係請托有涉干礙仍聽本道參呈
從重究治此於常限之中而尤示之以不常之限
於一定之法而尤施之以不測之威則甄別嚴明
人心惕勵庶課額可完而於官常亦振肅矣

一呈

巡撫陳

批委官抽課旣泥於常限可証而貪夫

侵漁又廢乎法紀不戒是宜課額歲愈耗而欺弊
日益滋矣該道此議灼灼有見具見留神剔蠹清
源之至意如擬嚴行各官遵照痛自改圖該道時
加督察分別勸廉懲墨務俾

國課取盈有加而官邪知警難犯也此繳

巡按劉 批依擬備行不時警察此繳

一爲欽奉

聖諭事照得本道奉

初督理銀場關係

國課凡財貨所產利孔固有弊竊亦深其各場礦脈
有盛衰不一商旅有聚散不同與凡利所當興弊

所當革一應下切民艱上裨

國課諸項事宜各該府州縣掌印及總理分理官員親
歷地方留心政體必見之真知之稔矣今照本道
接管合就咨訪用圖實政爲此牌仰各府州縣及
總理分理官即將所轄場分務要虚心查訪分別
硃口要見某場礦盛旺商賈集聚某場衰微商
旅稀少某場如常課銀照舊與凡場中利所當興
弊所當革與夫關切民艱

國課一應事宜逐一據實限文書到十日以裏作速
條陳具揭開報以憑採擇漸次舉行其各官實意
專爲地方留神化理卽此可占其槩矣慎勿漫言

泛舉塞責以負本道虛心延訪之意其其體之毋得遲忽未便

一為酌議銀場事規以祛弊端以濟

國課事竊惟銀場之設關係

國課顧財利所在奸弊易滋凡各場利弊當興當革上關課務下切時艱等項事宜本道接管謬司督理夙夜孜孜詢訪一二除前道舉行事體相同者不復煩瑣外謹將臆見酌議開欵伏候

鈞裁允日通行各屬產礦地方府州縣及各委官一體遵守庶弊源少革課務攸賴矣

計開

一定委官以一政體

照得銀場責任莫先於總理委官所以查理場務稽革奸弊課稅之盈縮地方之休戚恒必由之總理得人則分理委官皆見憚斂飭

國課易完苟非其人則分理官從而輕視乘機為奸甚至通同容隱其流弊有不可言者往時總理多委別府佐貳同知通判及三司首領官州縣正佐等官各場地方原非統屬以致政令紛更事不歸一且各官有廩糧之供跟隨人役有差遣之擾更有與分理委官互生嫌隙彼此訐呈殊非統體及照各場分理委官往昔多委隔別官

員管理各府正官及總理委官統攝不便且因途遠往返勞費夫馬各該硃頭老人爐戶人等假倚迎接饋送常例下程滋弊派擾又有告差官員志在貪求偶得行委到場不以公課爲重惟以利已足圖爲奸匿課玩法多端彼此胥病合無今後各場總理官專委本府佐貳相應官遇佐貳員缺就委本府掌印官不妨印務專理蓋滇中民事頗簡各場課務固掌印官分內事也分理委官及硃頭老人等皆其屬治不敢違梗而上下相信威令易行仍查照節行事例催督課務稽察奸弊礦脉盛衰以時更驗定數呈詳總

理一年務完一年之課不必另委隔別府佐并州縣正佐及三司首領等官以滋紛更之擾其分理委官半年限滿交代之期本道預先通行各產礦地方該府正官查將所屬附近場分衙門屬官查其平素廉慎知自愛者開報選委呈請

兩院定奪批示管理庶本府總理官有所統攝易於稽察清查而各分理官以轄屬親管府官自將畏法奉公砥礪幹理不敢縱肆偶遇所屬缺官方擬附近相應者間用斯委官得人而課額不虧矣伏乞

鈞裁

二慎採礦以重民命

照得各場所開硎口惟以地利所產而人因之採挖中間有巖石阻塞難於開通者有土踈易塌難於修廂者有水硎滄沒難於車水者有礦在河心入於水底採撈者揆其取礦殊甚艱難蓋小人見利競趨不惜身命苟上之人不爲法制禁止則因利貽害於山谷之間而義夫壓死者何筭死而隱忍不報者又不知其幾矣雖國課爲重而民命所關爲國保民者寧使山澤有遺利不忍瘡痍有遺寃也合行總理委官遍詣各

場從實查勘如遇有石阻土踈水滄難採硎口嚴諭硎頭廂手義夫人等俱不許圖利採挖卽行禁止呈請封閉應辦課銀照數除豁如各硎開挖槽道深遠者欲其堅固惟以修廂爲要近訪各硎廂手分礦得利修不如法以致硎土崩塌壓死義夫雖官給銀優恤而廂手利害不相關涉漫不經心無以示警今議每硎一口僉選慣熟廂手二名責令硎頭保領在官隨同義夫分礦作爲工價如遇修廂責取用大樣木板用心如法修理堅固築完務使槽道坦平出入利便如有廂不如法壓死義夫者除每名官給銀

二兩之外仍於廂手名下均追銀伍兩助爲埋
葬之資甚致壓死二名以上者將廂手問罪革
退另選充役庶使利窟有限制廂手有專責而
義夫賴以全活者多矣伏乞

鈞裁

三禁科歛以肅官箴

照得各場委官中間自愛者固有其不自檢者
惟殖私圖罔惜官守臨場之初積戀祠老爐行
人等每以過山扛索下馬飯下程拜見常例爲
名饋送禮物委官則酌其花紅回荅及假科派
循環日行紙劄心紅筆墨供應等項彼此交通

扶同作弊今後議行各委官務要奉公守法潔
已徵課本等廩糧之外前項饋送科派等項嚴
行痛革再不許假公科歛自犯官邪如有違犯
總理委官訪實密報本道以憑拏問轉呈革職
庶法令森嚴官常自肅矣伏乞

鈞裁

四公發賣以平市利

照得各場採獲礦砂多是發賣在場四聚覓利
之徒見礦盛旺更有分數者叢集爭買強者一
股併吞弱者不得染指致相爭競屢起訟端是
非均一之心平市之法也今後議令各場分理

委官置發礦簿一扇類將買礦客商姓名次序
登記在簿責令承買遇有礦砂不論盛衰照彼
時價以羅爲度公平交易過而復始不許徇私
越次如有恃強爭買者拿究招詳委官扶同越
賣作弊者許於總理官處申告究罪斯市利平
而爭端自息矣伏乞

鈞裁

五清硎口以便稽課

照得課出於礦礦出於硎有硎則有礦有礦則
有課此山澤一定之理也今各礦硎未經查明
每遇委官解課虧欠假倚硎口荒廢爲詞無所

稽查合將迤東迤西見開各場硎本道選委名
總理官遍行親詣逐場逐硎查勘要見某場原
開舊硎口若干今荒廢若干見開獲礦若干所
產礦砂是否完足額課應否照舊若礦盛旺酌
議加增若礦衰微作何議減逐查明白開具硎
口的數先期呈道候委官限滿解課赴道考察
以便稽查以後每年終清查明白繳報庶盈餘
者不得欺隱虧欠者不得藉口也伏乞

鈞裁

六嚴登記以稽課數

照得各場委官抽分官礦多有收囤房窖之內

積至十餘日或半月一月方纔淘洗發賣煎煉
其多寡任意填報循環則總理官何所覺察稽
查乎今後合議令各委官將每日抽分官確俱
要賬同銅老隨日淘洗淨礦秤重若干每斤賣
銀若干登記本道給發實徵循環簿內申繳查
考不許拖延月日堆積礦數自行私賣違者聽
總理官申呈坐賍究罪庶發賣及期衆目共覩
將無所容其侵匿矣伏乞

鈞裁

七杜爭訟以懲豪強

照得各場居住軍民商賈俱係四境雜聚其間
流移亡命豪猾之徒相煽倡害地方者皆因在
場鬧究爭嗣逐末竟利互相號攘少不遂意輒
行架禍本乘小忿却捏人命強盜搶擄侵課刁
拐引誘等項情節赴上聳告及至批行審問不
赴聽理或相私和騙財或畏情虛躲避經年累
月事不歸結以致負累病民又訪得各處無藉
及在場勢惡棍徒如遇硃口礦旺却將板榔扇
帕相送名爲把飯每硃一口挾索詐銀二三兩
者有之五六兩者有之如不滿欲輒以欺隱

國課爲詞告害委官硃頭場中蠹弊莫此爲甚合行
總理委官出示禁諭凡在場中商旅人等務須

安分本等生理不許恃倚豪猾捏詞搆訟欺凌
良善怙終爲非及用檳榔扇帕把飯挾索騙財
如有此等總理委官徑自拿究申詳其一切事
干場課等項詞訟俱赴該府或總理委官告理
究處輕則徑自發落重則具招呈詳分理官不
許干預訟詞違者一體查究及照臨安府所轄
中場箇舊烏谷小判山場左右相環皆毋鷄夷
寨夷賊往往糾合劫捨白晝殺人無由禁止誠
爲地方之害相應禁戢以弭盜患合行總理官
嚴督各該防禦哨守巡捕人員各守疆界如有
土夷出劫併力緝捕務要拿獲解赴臨安兵備

道依律問究招詳各該防守人員坐視故縱者
總理官查實指名呈報參究治罪斯豪強斂戢
刁風知警盜賊可弭而地方底靖也伏乞

鈞裁

八定役使以革寅緣

照得各處每場僉設老人一名碇頭一名眼同
分理委官抽課類解今訪各場碇老之外又有
挫抹掃土或一名二名克當多係無籍之徒寅
緣供役到場甚至與委官爭衡作弊侵匿爲奸
似非法體合行委官責令各爐戶將到場居住
人戶僉選素行朴實無過者充當老人碇頭每

場二名呈報該府查勘取具地方憐佑不扶其
結方許該府給帖應役眼同委官抽分登簿務
足課額如有虧欠者一併監追不許無籍濫充
庶役使得人而浸漁者或寡矣伏乞

鈞裁

九禁靡費以正風俗

照得各場地方利端所在侈靡易滋訪得多有
無籍遊手棍徒假以上場貿易三五成群市酒
爲樂酒醉之後野性橫行拔刀殺人攘奪爭害
誠爲地方大蠹又有等不良之婦潛住在場爲
娼引誘義夫及良家子弟姦淫往來蕩費財物

風俗之壞莫此爲甚合行嚴加出示禁諭各場
軍民不許造賣酒漿引惹爭禍遇有娼婦隨卽
驅逐遠去不許潛避在場爲非敢有違犯許總
理官究罪招許賣酒之人枷號一箇月娼婦當
官嫁賣財禮入官各委官容留故縱查出一體
治罪庶冗費革而民害除矣伏乞

鈞裁

十定額課以戒浸漁

照得各場抽分俱以三分爲率官抽一分作課
類解硃頭一分作爲飯食鉛炭之費義夫廂手
一分作爲工價之數議行已久法非不善但近

來有見礦抽分之議實資委官硃老侵匿便計則抽多報少何所稽查合行總理委官如本道循環簿式每場硃各置立循環文簿二扇給發分理官將逐日所抽官礦眼同硃老登記在簿每半月循去環來呈報總理委官考較仍聽本道不時吊取稽查如前報少而後報多必其礦旺前報多而後報少必其礦衰總理委官就便親詣硃口煎驗或以三五晝夜爲率比對循環如數目相同者免究若有每日差欠一兩以上者卽係侵匿就將委官硃頭審究追問贓罪具招呈報本道轉詳發落另委相應官員更代若

礦盛旺殊常者酌議加增呈報入額不許通同容隱指稱見礦抽分任其恣意盈縮以滋侵匿之弊夫場課雖有定額而商稅尤當清查近聞各場委官如遇商賈輳集多將稅銀移下及額外勒取隱匿不報妄捏虧減漫無稽考且甚病商應行總理官以時稽覈照依市貨聚斂應增應減酌議實數申詳入額時報循環簿後備查不許欺隱侵匿訪出一體叅究庶查覈嚴明則奸弊漸革而額數自足矣伏乞

鈞裁

一呈

巡撫陳 批據議條陳十事深爲剴切礦場利弊允若

茲則風清肅剔而國課益增矣如擬施行之此繳
巡按劉 批據議於銀場清源剔弊之法詳盡通
行各嚴守如法從事此繳

一為報開銀場事隆慶二年二月初二日申時奉

巡撫陳 批據雲南尋甸民吳德劉寅李宗麒于
應雷告稱尋甸府地名哈鷄慈馬立等處週圍肆
拾餘里產出銀礦德等情愿自備工糧召夫開挖
增課等情奉批仰銀場道查議報奪奉此依奉劉
行尋甸府查勘吳德等所告哈鷄慈馬立等處是
否即係納石崗委冲象鼻嶺等場山界礦脉相連
各告有無更異地名如係納石崗場已議允封閉

今又告開本場與諸賊巢相隣引惹盜賊利少害
多貽累地方毋苟且扶同以顧目前之小利貽後
日之未患速報去後隨據該府申稱行間又蒙曲
靖兵備副使向 案驗准督理銀場本道關同前
事備案仰查報依蒙查得卷內嘉靖四十三年七
月十二日為屢惡朋計不遵封閉明文朦朧開挖
銀場急變地方事蒙曲靖兵備副使陸 查得納
石崗銀場先准督理銀場參政熊 關呈奉

巡撫呂 批據本道呈為懇乞早賜委官督理抽
分加增課銀以圖報本事奉批礦脉微小妄加開
挖誠為利小而害大俱如擬嚴行禁約施行如有

故違拿解重治繳奉此又蒙

巡按王 批據本道呈爲懇恩增課濟民事蒙批
如擬礦硐照舊封閉仍曉諭各徒解散此繳俱經
備關本道亦已案仰該府封閉訖訪得該府地方
聚積礦徒數千在於該管山場開挖恐惹地方盜
賊出劫干係匪小牌仰本府隨差散官楊世榮巡
捕老人楊文光把事楊遇先等前到委官曲靖衛
指揮把守勳馮維良處各官俱在象鼻嶺場督併
百戶翟寅郭寧嚴璋武畧孫立李秋余相等招集
義夫數百餘人開挖但本場與納石崗場相連其
舊場未開又爲順民情報礦出現以增

國課事准把守勳關奉銀場道叅政熊 批據平夷
衛軍餘鍾朝用等連名告爲遵例報開銀場增課
事又該指揮馮維良千戶巴陞親詣所告象鼻嶺
場估勘煎煉樣銀督併童應朝勘報間又奉本道
信牌奉

巡撫呂 批據課民李秋等告爲懇給示以增

國課事奉批銀場道查報牌仰本府查得各官開挖
硐名象鼻嶺場與原封閉納石崗場相連鍾朝用
等告稱礦脉出現情由具告銀場道并

巡撫衙門俱行曲靖府轉行把守勳等其本府原
未奉有明文備由呈報兵備道蒙批據呈明係推

托他日地方生患誰任其咎仰府嚴行查報毋貽後患此繳蒙此詳報間本年八月初四日奉

巡撫呂 鈞牌為地方事訪得尋甸府納石崗場先已開挖後因強寇出劫屢經議革封閉法律正嚴仰府督責營火童應朝速將在场流民盡行驅逐趕散如有抗違先將為首之人拿解童應朝以功准贖若童應朝徇情故縱致貽地方之患該府就便鎖來解院如果踵惡抗拒星飛申報以憑會調各土官兵擒剿以正法典該府仍遍諭所轄鄉屯村寨軍民人等不許駝載米糧潛住彼處販賣一體挈問奉此又奉帶管銀場道參議歸 信牌

為嚴禁竊挖事仰府將納石崗紅石崖象鼻嶺等處責令的當官員速將各場硎口嚴加封閉其聚積礦夫人等悉令解散各還生業所搭茅蓬盡行燒燬諭令火頭童應朝用心督兵巡邏毋容各徒私竊先取童應朝重甘結狀繳查仍仰本府將李秋等提解等因奉此依奉行鳳梧所巡捕千戶李躬行等督責火頭童應朝將在场流民盡行驅逐趕散各場硎口嚴加封閉及遍諭地名魯石等屯軍民不許駝載米糧販賣人犯獲日另行解報緣由回報銀場道并

巡撫衙門去後蒙按察司憲牌為懇給示以增

國課事奉

本院批看得通判徐子麟止奉該道禁遏公文輒行查勘而指揮把守勲千戶巴陞通同礦徒擅自開挖久閉頑礦俱屬違法仰按察司查提究問明白具招通詳此繳又蒙

巡按王 批按察司查究報蒙此牌仰尋甸曲靖二府行據陰陽官劉繼巡捕老人何祥等回稱數內犯人翟寅孫立等蒙雲南都司行提去訖其李秋潘仲鍾朝用曹誥俱未奉提之先脫逃止獲正犯劉玉崑陳淵等解赴本司訖其散行指揮把守勲等行曲靖府提解又蒙曲靖兵備副使陸 案

驗為申明禁封閉礦場以靖地方事奉

撫按總領

衙門案驗前事案仰本府即行掌印通判梅濱

會同指揮繆宗臣親詣象鼻嶺等處速將在場一應軍民人等盡行驅逐趕散回籍各安生理礦脉硎口固密填塞照舊着實封閉敢有抗違仍肆竊挖就便擒拿等因遵照在卷今查得吳德劉寅李宗麒余應雷等告開哈鷄慈馬立等場係是已故火頭章應朝地方即各納石崗象鼻嶺等場也一派東近曲靖南逼馬隆西屬本府近東川雷益與阿往阿納夷寨相鄰離別咫尺不遠先年屢被強賊抄搶引惹釁端節奉明文嚴經封閉已久

今各告亦不係本府人民俱係上年開挖之徒更名易姓假哈鷄慈馬立之名意在竊挖納石崗象鼻嶺之場倘惹釁端其禍匪輕及審本府者儒軍民土率人等各種地方原係盜賊出沒處所甚不相宜民心俱不樂從卽今年歲荒歉米價高貴若開此場勾引棍徒聚集人衆富豪將米囤積索價四夷起釁接壤交侵爭利讎殺抄搶劫掠繁府子民老少不得安生况夏稅秋糧亦難輸徵本府尤恐不的覆委千戶諸愛并老人李朝清羅甲保親詣地所勘得告開礦場果係納石崗相鄰切近東川露益諸夷賊巢人民俱稱不便利少害多委

採挖應該出示曉諭嚴加封閉毋致告擾庶免地方之患等因申詳到道行間又奉

本院批據吳德李宗麒劉寅吳邦選武慶又告爲報開銀場事奉批仰銀場道查議報奪奉此本道看得吳德等所告尋甸府哈鷄慈馬立出產銀礦乞要開挖已經該府查審一節爲照納石崗場山地綿長四十餘里礦脉雖有但與雲南川貴三省接壤先年流民諸夷蜂聚萬餘諸盜乘機劫殺利少害多恐惹意外釁端所以節據假名告開屢經查議封閉無非爲地方免貽後患至計所據哈鷄慈馬立場與同納石崗象鼻嶺等場照舊嚴加封

閉仍出示曉諭吳德等安靜欽哉敢再貪利假名
違禁告擾定行從重問遣不貸蓋有礦脉抽分目
前雖得微利而夷民雜處爭捨實貽將來後患故
爲地方遠慮者寧使山澤有遺利而不使地方有
永憂况該府申稱利少害多則誠謂盈縮之數難
以期必所得不足以償所費似當嚴行封閉永杜
釁端斯足以息諸夷民觀望爭擾之念而地方底
清矣合就通呈爲此

一呈

巡撫陳 批看得納石崗銀硿密邇賊巢縱使金
谷露形亦爲地方利害關係甚重况係浮砂亦非

真有礦脉旺盛乎先年議令封閉蓋懲致寇聚衆
誠爲有見乃今棍徒吳德等惟知貪圖小利不遵
明禁更名哈鷄慈馬立場妄告開挖殊爲可憾該
道所議具見留神如擬嚴行尋甸府出示照舊封
閉掌印官督責巡捕人員時加巡察敢有擅自竊
挖卽行擒拏重究毋得縱容責有攸歸再行告擾
該道卽拿綁解軍門照例問遣仍行府摘將歷年
議禁封閉事由勒石於公署之左末爲鑒戒遵守
以杜釁端此繳

一爲建立義塚收埋枯骨以順天和事隆慶二年六
日十七日奉

巡撫陳 批據分理中場委官曲靖府南寧縣典史徐邦遜呈詳建立義塚比照各府州縣致祭無祀鬼神事例每歲清明七月十五十月初一日三次每次動支本場委官經理課務詞訟紙贖銀內貳兩買辦祭祀等緣由奉批仰銀場道查報又蒙巡按劉 批銀場道查行報蒙此依奉查得各府州縣設有壇所歲舉厲祭此皆舊典應各有司奉行今典史徐邦遜委管中場課務見彼義夫人等染患瘴毒及嗣崩壓死者多屍骸暴露傷觸天和本官既捐俸薪銀建完義塚築砌墳垣埋瘞骸骨請祀拯恤一節誠優卹存歿為地方之意相應允

行合候通呈詳允准照所請備行臨安府轉行中場分理委官遵照每歲清明七月十五十月初一日遇祭之期呈詳該府於收貯本場委官經理課務詞訟紙贖銀內動支貳兩給發該年分委官買辦祭需致祭義塚拯恤孤魂未為定規自後凡有死屍諭令報官驗明無故卽令嗣老總甲擡於塚內埋塋不許暴露致干天和如有違者拿問究罪招詳合就通呈為此

一呈

巡撫陳 批立義塚瘞枯骨而舉厲祭以順天和一典史而能留心禮制若此則長民人社稷之寄

者當何如其為愾愾也如擬施行仍委之以庶鄉
約繳

巡按劉 批依議行繳

